

安次馬鴻翱著

桑梓紀聞
一卷

天津潘世長題



啓事

敬啓者鄙人鄉隅僻處殊少見聞編輯此書定多罣漏渤海名儒畿輔

賢達如有闡揚幽隱之鴻篇巨著或筆錄傳聞或記載軼事不吝賜

教者皆所歡迎但使本書由一卷二卷至十卷百卷陸續出版傳之無窮

庶幾有益人心有裨社會是則鄙人之私願也

編者識

如賜稿件請郵寄安次縣得勝口鎮三餘堂

自序

直隸爲首善之區漢魏以來代有偉人讀史者知之熟矣明清兩朝人才輩出名儒循吏詞客騷人以至一書一畫多可傳者時代較近父老猶能道之鄙人少壯不學老大無成甲子之春教讀於益津杜氏課餘多暇因就桑梓中有關風化有裨勸懲之事或鈔錄載籍或記述傳聞日久積成一帙名曰桑梓紀聞聊作茶餘閒話如謂用以傳世則吾豈敢乙丑冬月安次馬鴻翹朋卿氏序於隱庵



桑梓紀聞卷一

目錄

善人厚報 後韓昌黎 萬硯樓 王剛節公生日詩 再賺蘭亭
畿輔四名士小傳 鐵公有後 二劉競爽 晴溪善書 津門二喬 兇觥歸趙
鳳硯還陳 孝子^四 蓋縣俠義 寄傲軒詩 綦烈女 折獄四 蝶階外史
豔雪樓 殉葬古器出現 瓜子皮詩 鴉片煙賦 石氏善果 橋梓丹青
一吾治水 捐金贖歸罪 井書御扇 全家殉難 一門風雅 父女善畫
芥子銅政 閻公對聯 朱太守 林佳蔭 朱公博學 谷公良史
王宜人墓志銘 華公醉書 母女唱和 李少尹 王烈婦 文安女
良朋高誼 石耕善琴 李公盛德 提因讓產 華省仙郎 竹坡工書
若水善畫 一門孝行 先麓著書 于公讓財

桑梓紀聞卷一

安次馬鴻翔朋柳編輯
天津戴韞璋玉山校閱

善人厚報

安州陳半千先生。善士也。順治庚子舉於鄉。從孫夏峯先生講學河漳。家僅中貲。雅好施與。明末盜起。流離相屬於道。收養難婦百餘人。於州城朝陽觀。問其里居姓氏。送之歸。又遍收途次棄兒。令家人飼養。全活甚衆。避賊完縣。趙受繩憐其貧。餽以金。不受。友人某嘗假舍於先生。輒私竊之。而取其值。先生不問。曰。朋友之義固然。此錢。我者何較焉。游大名。有史姓者。以事繫官。先生察其無辜。言於太守。得解。後一日。史姓攜其女至。願爲先生妾。先生正色辭之。讀書樂善。老而不倦。年七十五。卒於家。子鶴齡。字鳴九。康熙甲子舉人。孫德榮。字廷彥。康熙五十一年進士。官至江南布政使。德華。雍正二年狀元。官禮部尙書。德正。雍正八年進士。官陝西按察使。曾孫策。乾隆丙辰進士。筠。筌。皆舉人。人以爲盛德之報云。

後韓昌黎

昌黎韓南溪先生超才兼文武。咸同中偉人也。與胡文忠公林翼相知最深。以道光甲午副貢就職州別駕。分發貴州。咸豐中貴州苗匪蠢動。先生投效軍營。屢立戰功。時稱韓家軍。以功累升貴州布政使。同治元年署貴州巡撫。黔入仿宋宣和遺事。著爲書。以紀戰績。後以病免。家居閉戶自修。不再出山。光緒四年卒於家。年七十有九。謚果靖。世推爲後韓昌黎云。

萬硯樓

霸州邊謝園太守寶樹。道光丙戌進士。博雅能詩。好硯成癖。著有燒豬集詩稿。藏書三萬卷。購端硯許多。築小樓貯之。號萬硯樓。以御史出守衢州。逾年解職。卒。身後蕭條。有伯道之感。故詩稿散佚。聞其自述一聯云。愛書珍似連城璧。惜硯多於負郭田。其風雅可想見矣。

王剛節公生日詩

寧河王剛節公錫朋。少雄武。有俠氣。以武舉補兵部差官。援例得固原城守遊擊。屢立戰功。升壽春鎮總兵。道光二十一年。英吉利陷定海。去之。八月英軍再至。公守九

安門。鄭國鴻駐竹山門。葛雲飛駐曉峯嶺。相去十餘里。敵先犯九安門。戰不利。退攻竹山曉峯。公馳救。兩營已先敗。公力戰。衆且盡。敵軍至益衆。公揮短兵。殺數十人。陷陣死。是役也。敵軍三萬。我兵僅五千。請益兵。大府不應。三總兵皆坐是死。公殺敵獨多。死尤烈。事聞。以提督禮賜諡剛節。卹建專祠。孫師鄭主政。輯名人生日表。知公生於乾隆乙巳九月十五日。其曾孫酌笙大令。賦五言古詩三十六韻。詩曰。

請芬誦先人。數典敢忘祖。衰門有子遺。歲暮懷先緒。伊昔宣宗朝。剛節建旗鼓。奮鬪

殊可嘉。煌煌荷天語。湖北巡撫肅清殊批王某奮勇可嘉海疆初告警。奉命整師旅。先聲早奪人。禮義

皆干櫓。公所部壽春鎮兵訓練最精大吏奏再舉守舟山兩浙實門戶三鎮相犄角

同心禦其侮。葛鄭同兵械恐非敵。上書請大府。嚴詞來譴責。鼓瑟乃膠柱。時以洋人船堅砲利

請毀寺鐘鑄砲並請濟師經略裕謙批云故意苦戰六晝夜。援師曾未覩。天柱自此

傾鍊石嘯能補。迄今八十秋。鑄錯何堪數。四裔撤藩籬。九州無樂土。外侮未瓜分。中

原已豆剖。海上多遺老。故都痛離黍。周道鞠茂草。堯階侈薌莆。柱高不可攀。蘇甘柔

則茹。尚乞勾漏令。聊寄伯通廬。差免飢塵生。遑問鹽車苦。石城初稅駕。入幕知孫楚。

杜句憶釋春明褐。同隸天官部。滄桑今幾變。南雁皆愁侶。十載隱若見。兩情吾與汝。下吏走踐踐。碩人獨俟俟。解舍雪初晴。樹鵲噪亭午。郵筒發新詩。風雅兼今古。陶潛羣輔錄。賈執英賢譜。天命始降衷。吉日生申甫。網羅足文獻。次第按時序。別體列叢書。軼事登雜俎。乾隆歲乙巳。季秋月三五。家乘或有聞。斯編乃枚舉。曾孫如在疚。所愧繩祖武。借問此何時。當道多豺虎。茫茫百感生。掩卷淚如雨。

再賺蘭亭

靜海薛竹溪茂才宗灝。性敏捷。多材藝。與其弟魯川孝廉宗沂。文名噪一時。邑人有大小薛之稱。魯川能文。竹溪工書。尤善臨摹法帖。能作偽亂真。嘗蓄裝潢匠一人。凡有贗鼎。爲之加意裝飾。有富翁某。方以多金購書畫。竹溪僞製蘭亭一帖。值崇厚。以伊犁交涉下獄。竹溪喜甚。以其隙之可乘也。遂於京師骨董肆中。擇一善辯者。許以獲利均分。攜僞帖而往。結某曰。聞公精於鑒別。此宋半間堂賈氏本也。會字全泐。可證。麟見亭河帥。昔以數百金購之。今其子崇厚。罪重彌天。將籍其家。故不惜遍賣藏珍。用以贖罪。何幸覩此秘寶也。某嘗閱鴻雪因緣。深信不疑。問其價。故以五百金昂。

其值某竟與以百五十金之數。余曰。蕭翼賺蘭亭後。又有此舉。可謂再賺蘭亭矣。

畿輔四名士小傳

同治中興。人文蔚起。應試文字。有承平雅頌之聲。卽一書一畫。多可傳者。畿輔首善之區。尤多竊林佳話。昔人嘗有一聯云。西樓文章東峯畫。午橋書法子年詩。久已傳誦一時矣。余因作四名士小傳。

劉仲箴。號西樓。靜海縣人。敏而好學。淹通經史。工制義。咸豐乙卯科。試前。夢一人頭角崢嶸。手持一紙。上書不以禮節之。亦不可行也二句。並以大珠强塞其口。驚而寤。因告同寓諸人。皆曰。子已得驪珠。必中無疑。入場。首題我對曰無違。是科以額滿見抑。以爲夢幻無憑矣。辛酉科試。取優等。登拔萃科。督學使者奇其試卷。曰。劉生文。爲津郡闔屬之冠。俊才也。秋闈試題。適合前夢。喜甚。三菡一揮而就。中式第十五名。同治癸亥會試。成進士。榜下卽用知縣。分發湖北。卒於官。

任海瀛。字東峯。大城名諸生也。學問淹雅。善丹青。山水學大米。尤工墨牡丹。余家有富貴圖十二幅。大機橫溢。神彩飛舞。眞寫生手也。其姪孫毓桂。字馨齋。親授衣鉢。亦

工繪事。然不輕以許人。與余爲莫逆交。嘗爲作墨牡丹一幀。與十二幅並懸一室。幾不可辨。家學淵源。信哉。

紀昶。字午橋。一字悟樵。文安人。道光己酉拔貢生。博學工書。深得蘭亭三昧。官江西新淦縣知縣。公餘之暇。喜作草書。時人得其寸楮。珍如拱璧。性廉介。仕贛數載。兩袖清風。人到於今稱之。

劉蔭椿。字子年。西樓從弟也。天資超卓。淹雅能詩。夙好詼諧。猖狂踈弛。於人無所不侮。自言前身是西湖靈隱寺擔糞僧。同治癸酉科拔貢。光緒丙子鄉試。詩題秋風起兮白雲飛。起句云。白戰秋闈裏。風雲遇合奇。試官大奇之。遂中式。己丑科。捷南宮。官錦州順德等府教授。中夜失火。幾焚死。作回祿餘生吟四首。桀桀索和。積詩高至尺許。以大城縣劉子山師之作壓卷。余猶記前二首云。赤牒奮怒燎狂生。滿屋煌煌似火城。虎口險於邊大綬。鴻才幾喪鄭通誠。漫誇金榜三春貴。卻怕青藜一夜明。劫外餘齡真可賀。笑看花影過棋枰。前生湖上奉金仙。今世才華太炫然。佛火焚身原夙習。龍雷破壁有奇緣。酒狂難入清涼界。醉袖偏逢熱惱天。幸爲茶毗神所祐。壽逾寶

掌一千年。戊申。貧病而歿。悲夫。

鐵公有後

馬允剛。字見一。號雨峯。開州人。明鐵忠烈公鉉之後裔。乾隆戊申。登賢書。官安徽池州府知府。劉大觀有書馬雨峯大令畧陽沔縣禦寇事。錄之如下。

明鐵忠烈公。死建文難。有經歷宋某。負義挾忠烈二子逃開州。長匿李氏。次匿馬氏。遂從其姓。雨峯氏馬。蓋忠烈次子後也。以孝廉宰秦中。嘉慶戊午七月。奉撫軍檄。轉餉甘肅。協川軍麥十萬石赴畧陽。濟軍食。運至。賊高三馬五。餘黨有先聲寇畧陽。鄉民恐陷賊。偕妻孥避難。城中武弁。閉城不納。雨峯曰。城以衛民。不納。民奚往。出城督民囊麥入城。須臾麥盡。賊已半渡嘉陵江矣。賊攻城。城門朽敝。雨峯以麥囊堵城。恃以無恐。三日。大兵至。賊解圍去。己未八月。任沔縣。賊勢方張。戕掠無算。牒鄉父老。築堡四十餘處。賊技窮。秋毫不能掠取。時羣以築堡爲迂怪。未幾。朝廷有堅壁清野之命。大吏檄州邑築堡。同僚始服其先見。方賊圍沔。請發鉛丸火藥以爲備。軍門斬之。雨峯以火藥一囊。分十餘囊。多製竹籠。籠標一旗。曰軍需火藥。其可須臾運畢者。乃

令民間累日運之。賊聞有備而去。

〔庵居士曰。開城納難民。仁也。分囊運子藥。智也。仁且智矣。非所謂循吏者乎。嗚呼。四百餘年。明社久墟。而鐵公之後。又有循吏。人謂天道無知。吾不信也。

一一劉競爽

永清劉石橋刺史伯壘。與其弟癡雲處士仲簾。均有詩名。刺史少年科第。博學多才。師事湯海秋先生。惜莅隰州任未久。卒於官。未竟其用。良可惜也。處士性孝友。少棄舉子業。盡力於詩古文辭。親喪廬墓三載。宗族稱孝。鄉黨稱悌。兄弟競爽。視彭城三筆六時。有過之無不及焉。孫雲孫茂才。亦工詩。著有夢瀾室詩存。

晴溪善書

宛平張模。字元禮。號晴溪。以名進士。官吏部稽勳司郎中。博雅工書。與翁覃溪宮詹爲莫逆交。晚年主講天津問津書院。教士讀書。務爲根柢之學。生平精鑒古。商周彝器。偏旁款識。均能辨晰。書法南宮。嘗摹刻貫經堂米帖行世。亦來禽戲鴻之亞也。

津門二喬

天津喬五橋耿甫。性疏狂。善書。能以縣濡墨。作擘窠大字。人以爲奇。其弟樹勳。工詩。有六橋詩鈔。津門人因有二喬之稱。

兇觥歸趙

翁覃溪宮詹。以書名海內。有清一代。吾直巨擘也。而詩名爲書名所掩。然其歌行。古晉古節。世之盡力於詩者。或不能及。乾隆中有兇觥歸趙歌。其事其詩。藝林傳爲美談。隨園詩話。僅載四聯。昨閱復初齋集。得窺全豹。因附錄於此。

明萬歷五年。常熟趙文毅公。

用賢

劾張江陵。

居正

廷杖謫戍。其友庶子

官名

許國。銘兇觥爲

贈。蓋取神羊一角觸邪之義。後流傳數易其主。五世孫玉槐。探知在山左顏衡齋家。乃製玉觥銀船。托宮詹作詩。易之。竟得返璧。一時題詠如雲。

兇觥傳來二百年。

黃端伯

陳潛夫

章後今歸顏。

朱檢討詩未銘。而我一再詩文編。

予釐

爲此

觥作歌。

并考辨

此齋此觥緣不淺。摹册成圖標成卷。觥居東魯定我懷。卷到西江欣客展。客

爲誰乎可共論。文毅五世之賢孫。是夕挑燈墮雙淚。天風激蕩江怒奔。趙叟雙瞳爛如電。見此兼旬廢眠飯。湖湘三月寄書來。不辭千里陳初願。報書爲我析其由。百斛

明珠那惜酬。只緣陋巷珍高誼。代友論心直到秋。秋來訪我廬山麓。青眼相看真面目。地從江介指齊魯。天教舊物歸嘗熟。地志古作嘗熟顏公心事惟我如。顏公嗜好乃獨奇。世間無物此觥配。壓囊只要覃溪詩。君往叩門再拜說。淡交千古盟冰雪。月暈光仍舊酒痕。血誠氣可穿山裂。顏公奉觥向君笑。趙叟傾心誓相報。觥喜多年逢故人。叟泣還鄉告家廟。向來藏虹事偶然。今日還觥事更傳。譜出兕觥新樂府。壓倒米家虹月船。

鳳覩還陳

一物一器。失而復得者。莫不喜出望外。人之恆情也。矧其爲藝林妙品乎。河間紀文達公。閱微草堂筆記。載其戚陳來章先生。得一古硯。上刻雲中儀鳳形。梁瑤峯相國爲之銘曰。其鳴將將。乘雲翱翔。有矯之祥。其鳴歸昌。雲行四方。以發德光。時乾隆三十八年癸巳閏三月也。至庚子。爲人盜去。丁未。先生仲子聞之。多方購得。癸丑六月。復乞余爲銘。銘曰。失而復得。如寶玉大弓。孰使之然。故物適逢。譬威鳳之翬雲。翩沒影於遙空。及其歸也。必仍止於梧桐。事頗風雅。可與兕觥歸趙。大然巧對。

孝子

天津吳召棠先生家齊。孝子也。原籍江蘇。其父某君。於同治初。從征洪楊。不克如志。寄居津門。民國二年卒。臨終遺囑孝子。權厝於津。將來必還骨故里。孝子以治命不敢違。然遠隔數千里。舟車所達。又恐顛頓遺骸。深以爲慮。三年十二月。因公赴蘇。致察學務。道經里門。負土歸津。安葬新塋。其用心良苦。亦可謂孝矣。戴甥玉山。爲余盛稱其人。余爲賦七古一章。命男述周。爲文以紀之。並錄於此。

仲春游析津。驅車遵大路。路旁新塚一何高。土人云是吳家墓。吳公季札之子孫。洪楊之役來津門。往年怛化將屬纊。故鄉歸骨留遺言。吳公故里吳中住。生得佳兒心孺慕。本來治命弗敢違。千山萬水難飛渡。遙遙薊北隔江南。遺骸顛頓何以堪。一日九迴腸欲斷。憂心輾轉真如憊。孝可格天天所管。一旦天公假之便。勾當公事渡江來。一盂麥飯墳頭奠。恪遵親命且從權。哭祭新阡等舊阡。上塚重添一坏土。孝思直達九重泉。嗚呼津郡移來吳郡土。孝能錫類前無古。我作好歌示津沽。勸善尊親非小補。

吳孝子葬親記

人子之盡孝。亦行其心之所安而已。遯親命謂之孝。然有時人事錯迕。不得不從權以遯親命者。如天津西方庵小學校長。吳君召棠是也。君籍隸江蘇。其父某君。於同治初。從征洪楊。不克如志。寄居津門。民國二年。以疾卒。臨終囑其子若孫。權厝於津。將來必歸骨故里。吳君泣而從命。既而思之。由津門抵江蘇。路程數千里。設扶柩以往。山河之險阻。舟車之震撼。爲骸骨所必經。既無策以安先靈。又不敢違親治命。泣血椎心。不知若何輾轉也。然人子既竭其心。天必曲全其孝。民國三年十二月。因公赴蘇。道經里門。致祭先塋畢。負其墓門之土以還。奉安窆旁。嗚呼。可謂孝矣。周三尺微命。於忠孝大節。原不敢贊一辭。今春周表兄戴君玉山。來書揄揚其人。以爲事親者勸。乃揚言曰。吳君以孝子爲校長。吾知其一堂弟子。親炙有年。他日必盡爲孝子。教育所關大矣哉。若吳君者。洵足爲人師表矣。昔孟東野寸草春暉之詠。浹洽乎人心。茲更以一撮土之多。慰九原之望。古今人何劇不相及耶。乃載拜而爲之記。

陳孝子尙友。字慕齋。天性至孝。篤厚過人。少讀其伯父蘭雪齋文集。有不悌卽是不

孝語。不覺抃舞而告人曰。孟子惟能言先聖所未言。故爲大賢。此言亦先儒所未發者。善言德行。非此之謂乎。論者謂非言感人。亦其至性與言適相洽耳。母病篤。家人皇皇。孝子謂無害。醫曰。脾將敗矣。法不治。糞甘即其證也。孝子慘然默而去。然母病竟大愈。人皆譏醫之妄。而不知孝子嘗糞果甘。遂割肱以進也。年三十六。以毀卒。高孝子廣學。字博文。武清人。父世桐。太學生。生丈夫子六人。君其次也。聰敏絕倫。年甫十一齡。能誦六經。及宋五子近思錄。鄉里詫爲神童。母歿。哀毀如成人。稍長。事父先意承志。底豫無形。光緒甲申。與余同游潁水。遂訂交焉。其學一以宋儒爲宗。讀伊洛淵源錄。終日不釋卷。爲文好高古。嘗手鈔陳龍川文文山集。註陳寶田孝史。或以時尙科舉。宜攻帖括。規之。夷然不屑也。己丑秋闈。父忽中風痿痺。家人馳至都。告以故。乃星夜歸里。延醫躬侍湯藥。衣不解帶。便溺之器。皆親滌之。庚寅三月。父病篤。孝子焚香籲天。請以身代。而病卒不起。哀號躑躅。不納勺飲者三日。人勸以節哀順變。孝子曰。吾不能延親之命。何以生爲。居喪一本古禮。日食一溢米。杖而後能起。期年營葬有期。余適干役。過而弔焉。留宿夜談。具述其生平往事。余壹怪之。後聞葬其親。

畢遂以毀瘠死。其妻同邑孫氏。親視含斂。卜定寢期。乃從容謂家人曰。夫能殉父。婦可不殉夫乎哉。吾將追隨地下。請從此辭。語畢而僵。蓋已飲藥多時矣。壬辰。詔旌烈婦門。夫以無嗣。格於例。不得旌。嗚呼。孝子豈未讀孝經。毀不滅性之訓乎。吾知其父在九泉。憫其愚孝。而不欲其一瞑不視也。悲夫。

義縣俠義

清初入關。諸親貴得於畿輔五百里內。跑馬占圈。以酬佐命之功績。黎民苦之。義縣龐各莊有嫠婦。貧且老。挈一稚孫以居。一日其宅被圈去。迫令即日移出。婦惶急無措。拘其孫倚門哭。鄉人聞而哀之。然皆無可如何。有邊大有者。慷慨好義。里中少年慫恿之。使出爲理論其事。大有慨然往。不得請。且受侮而歸。怒甚。徑返其室。取一短刀。出其妻問之不答。時來此跑馬占圈者五騎。大有持刀至。悉殲之。衆大驚。勸其逸。大有呼曰。邊某豈畏死者。若逃去。必累此孤寡。則哀之者適以害之矣。丈夫有罪。不逃刑。死何足惜。卒自首。論死。時皆稱其俠義焉。

寄傲軒詩

余表弟曹藹臣大令彬。烈士也。光緒癸巳舉於鄉。官四川奉節縣知縣。廉明有惠政。宣統辛亥。革命軍起。守城殉難。著有寄傲軒詩草。猝遭兵燹。詩稿散佚。余猶記其赴蜀將行。留贈內子一絕云。結髮夫妻義命安。廿年藜藿與同餐。事親教子惟卿責。莫慮西行蜀道難。情致纏綿。殊可誦也。

蔡烈女

宣化暴烈女。孽出也。母見逐於嫡。並將鬻女。季父佩蘭憐而鞠育之。許字孫氏。未嫁而夫卒。訃至。佩蘭匿不以聞。將爲別字也。女與婢媼修織紵。嫡母至。詈之曰。賤婢刻殺丈夫矣。女聞之色遽變。詢婢媼得其情。託以疾。入靜室。吞阿芙蓉自盡。佩蘭痛之。曰。吾女盡死義也。孫氏知之。迎其柩合葬焉。余因賦烈女行。以勵女學。時宣統元年夏日也。

北方有苦竹。干霄生勁節。女子能將未嫁身。殉夫地下全貞烈。蔡氏有女賢且淑。母以小星遭棄擲。家庭幸有季父憐。道韞旋依謝安石。江左孫郎託靈脩。鸞皇可許鳳來求。御輪指日將迎迓。夫壻游仙白玉樓。叔兮聞訃偏隱匿。無端橫逆來相逼。嫡母

申申忽訐予。徧詢婢媼情難默。託以腹疾偃在牀。傷心一日九迴腸。可憐仰藥甘如薺。節烈昭回日月光。嗚呼文人動輒談倫理。求全不樂成人美。孤竹夷齊未仕商。首陽一餓眞同軌。畿輔山川毓秀靈。閨中奇女樹儀型。自由未俗欣堪挽。從一而終古有經。

折獄四

文安陳文度先生鳳友。蘭雪學士之仲子也。雍正二年進士。宰豫之南陽時。野有智井。春蠅爭集。先生過使探之。有死者裸。鎮以砧。出之。則面毀。近村人莫識也。縣治去井十餘里。有村婦失砧夜訐。召視。是其砧。先生問村誰亡。曰某去冬以兄嫂徙。然後失砧。先生曰然。此必某與嫂謀害其兄。毀其面。故鎮向竊砧以惑衆也。嚴限緝之。曰計今必已爲夫婦。已獲之。果然。又嘗遣役夜行。役獲盜。受十金。縱之。先生偵得其實。明日役至。先生叱曰。昨某盜所賄安在。役驚遽出金具服。由是民畏之如神。六年。擢兵部主事。丁父母憂。服闋。厯官刑部郎中。出知廣東韶州府。治行爲粵東第一。先是廣州增城民謀逆覺。官捕鞠之。詞連數郡。惟無韶民。韶人士喜其民之義也。譁曰。吾

韶六邑戶百萬。無一人從逆者。雖懷刑有自。非民之知方其能乎。後舉卓異入都。以病免。

河間李竹溪先生棠。乾隆七年進士。官如皋、元和、豐縣、句容、上元、天長、合肥等七縣。所至有循聲。如皋陳某。販紅草不歸。其兄過張氏池塘。得其尸。遂控塘主謀害。塘鄰姚德助其詞甚力。先生厲聲曰。殺陳某者汝也。不必妄引他人。姚色變。脅以刑。乃云素善陳某。知其身有鬻女金。故乘醉而夜擠於塘。人問何以知之。先生曰。姚有佯哀詐泣之狀。故疑之。而以恫喝得之也。句容賊王二。供與孔姓同竊。先生不訊孔而專訊王。乃惡丐某挾讐所教也。人問何以知。曰。凡盜賊引人。往往不實。我先根究原犯。使真情得。而後再訊所引之人。則思過半矣。原犯盜也。刑之非過。倘無辜之民。雖誤批其頰。於心不安。而況加刑乎。官不可爲賊所用也。薦卓異入都。遷大理寺評事。授廣東惠州府知府。罷官歸。卒於家。

文安王蔭桐先生秋元。嘉慶戊辰舉人。署山東平陰汶上縣。補高密縣。調清平縣知縣。以廉明稱。尤長於聽訟。初在省讞局。有某縣民某。與其姪女姦。謀殺其壻。移屍於

野。若路死者。因爲姪女抱告。縣中緝賊未得。案懸累年。迭至省控。廉使屬先生研鞫。先生閱案牘數日。卽於臬署公堂設高座。夜半提拘告某至。詳訊案情。已而卒然曰。爾何帶閒人來。某惶顧俯首無詞。又問曰。爾身後何人。某曰。姪婿冤魂也。誘令盡言。某直供無隱。並言在某所。爲其妻瞥見。傳訊其妻。與姪女供詞悉符。案遂定。廉使以案情曖昧。一訊卽服。因問先生曰。果見冤魂乎。曰。未也。但閱卷內。據旅店報稱某來省催案。在店無故自縊者兩次。此必有隱情。設詞以誑之。彼心怯。或實有所見。遂盡情傾吐耳。人皆驚爲神異。由是以折獄名。

族叔耀鄰公。以茂才投筆從戎。民國十年。充陸軍第六師軍需官。以功保縣知事。十二年。署理江蘇睢寧縣。謝絕苞苴。庭無冤獄。冬月野有屍。割面皮抉眼。人無從識之也。公令觀者辨其衣服。有張某識爲其子。泣曰。袴襦皆吾子婦手製也。呼其媳至。視之果然。公問曰。必有仇家。張對曰。吾子良民。無仇也。問彼時或懷有財物。曰。吾家故貧。無財也。訊之半日。莫得其情。姑存疑案。懸之多日。傳張某問曰。汝有親族乎。曰。有同宗數家。問平日皆輯睦乎。曰。均無嫌隙。問皆善良乎。曰。有堂姪朝貞。通於其族姪。

某氏。吾子規以婉言。弗聽。而兩人感情如故也。公曰得之矣。立傳朝貞至。恫喝之。朝貞曰。姦情則有之。害命則絕無其事。公下視其袴。短僅至胫。紫紺色。公曰。袴不適體。且係婦人服色。必非汝物。逼令脫去。檢視之內。有血迹。嚴訊之。朝貞曰。此吾母子易服。無足怪也。公以爲必有隱情。密令役至其家。給其母曰。汝子已將人命承招。汝子之袴。汝現著之。其母聞言。直認不諱。卽脫其袴付役。反而視之。血染殆將半矣。脅以刑。遂伏其罪。案定。邑人皆稱頌之。十四年三月辭職還。睢人曰。循吏也。吾邑數十年來所未有。爲建馬公亭。勒去思碑。嗚呼。爲民父命。庶無愧乎。

蝶階外史

遷安高寄泉先生繼珩。嘉慶二十三年舉人。博通經史。嘗襄校讎。輔詩傳。由教諭任廣東茂場鹽大使。設策禦海寇甚備。積勞乞休。著有蝶階外史行世。

豔雪樓

佟鏞。字蔗村。號空谷山人。宛平籍。僑居天津。性耽吟詠。築樓御河之北。妾趙氏。字豔雪。亦工詩。因以名其樓。誠騷人韻事也。至今遺迹。蕩然無存。人猶呼爲佟家樓云。

殉葬古器

京西大招山麓。爲農商部林業試驗分場。自民國二年。設官於茲。司護林育苗之事。三年以來。栽培達百萬餘株。纖修翬雲。蒼翠滿目。昔時之童山濯濯。固已蔚然改觀。徒以山徑崎嶇。不便巡視。乃謀治康莊。鳩工築道。畝者平之。隘者廣之。五年九月十八日。林場工役。方從事鋤鋤。瞥見道旁豁然有洞穴。廣輪揜坎。其高可隱。中儲古棺。黝黑不可逼視。諦審之。則有盃皿之屬。雜置甌石之間。工役舉以白場。中有司。識爲古代遺物。督役檢視。得金銀陶土玉石之器。凡百數十件。殘損剝落。完整者僅十之二三。金銀諸物。亦皆鏽蝕斑斕。饒有古致。中有方形銀盤。周約四寸。鑄明宣德御製詞及年號。刻畫工緻。書法秀逸。茲錄其詞如左。

御製花朝詞 千秋歲

融融淑景。雨止風初定。晴日麗。芳塵靜。紅妝花正發。翠黛山相映。草色迷幽徑。燕子飛來。並宜玩賞。尋佳勝。瑤琴絃古調。彩筆題清興。林亭外。夕陽西去移花影。宣德七年六月初八日。賜太監王貴。又銀瓶一。其底鑄二十八字。其文曰。尙衣監永樂元

年六月。內成造間鑲金茶壺一個。蓋攪全花銀二十兩重。銀條壺一。其底鑄十二字。其文曰。良巴茶壺。十七兩七錢。鎖蓋全。此外玉杯瓷罍之屬。大小百餘。惜皆破碎零星。絕無標識。山澤之寶。其出有時。是諸物者。不幸而委諸儉父之手。其存其沒。固未可知。幸而爲好古者所得。皮之篋笥之中。不數十年。授受易主。物既不能自道。其出處之歷史。年代之久暫。夫孰從而貴之。嗟乎。白楊秋老。誰尋狐兔之鄉。黃土塵封。空作帝王之夢。今世宦之族。競爲甄銘碑碣。鑄一二字以傳後裔。其猶此志也夫。

瓜子皮詩

龍雨樵先生鐸。宛平才子也。年十二歲。杭州宿儒朱桂亭先生。命賦瓜子皮詩。操筆立成一絕。詩云。玉芽已褪空餘殼。纖手初拋乍有聲。莫道東陵無託意。此中黑白儘分明。朱君大加賞嘆。乾隆中。登賢書。官吳縣知縣。

鴉片煙賦

武清張曉蓉。孝廉鵬翼。天才敏捷。晚年有阿芙蓉之癖。嘗作鴉片烟賦。字字穩切。一時爭傳鈔其稿。其辭曰。鵝兒酒後。雀舌茶前。煙花世界。燈火因緣。看登榻而吞吐。成

餐霞之睡仙。一口兩口。左邊右邊。未嘗不顧影自憐。可止則止。無奈此引入入勝。是煙非煙。原夫烟之名鴉片也。產自外洋。傳來中國。流毒無涯。居奇有客。花田萬畝。收來罌粟之漿。海國孤帆。送到波斯之舶。可是入善人之室。氣奪芝蘭。居然遵禹貢之經。土分黑白。水火既濟。煎熬最工。或燒燭於夕陽以後。或支鑪於午日之中。成此脂膏。大似陰陽爲炭。去其渣滓。當同造化爭功。調草蜜之絲絲。簾風扇碧。滴花酥之點點。爐火搖紅。於是倚鶯被兮輕挑。鵲象牀兮不倦。棲遲安樂之窩。困頓芙蓉之院。一燈如豆。青分藜火之光。萬念成灰。黑沁桃花之面。彷彿仙飛枕上。逸趣橫生。分明藥蓄房中。春宵久戀。其器則辨新舊。論短長。食無求飽。舍之則藏。脫手成珠。如擲麻姑之米。焚膏繼晷。疑偷韓壽之香。烟後則玉管飛灰。吹噓冬夏。燈前則文光射斗。掌握星芒。鴉鵲背之餘。另傳鴉片。烟袋烟壺之外。別號烟槍。彼夫視此爲應酬之具。援以聯聲氣之親。竟俾晝以作夜。時出門而同人。吞烟裏之烟。胸襟湖海。領味外之味。龍馬精神。乘興而來。且庶幾而式食。和盤托出。以宴樂我嘉賓。亦有空庭敝齋。倚檻支牕。輕癮重癮。將來未來。神不疲而自倦。淚交流而可哀。嘆當年之烟館。成今日之

債臺。連朝數口依人。不無忸怩。誰肯一杯分我。免此徘徊。我國家壽域恩宏。春臺日茂。布大德於生成。敷太和於宇宙。擬寒食禁烟之例。律甚森嚴。切小人懷土之心。品何卑陋。況呼吸日深。薰陶過厚。始則誤於因循。繼則戕其年壽。一搨腰輕。兩彎眉細。纔悔荒唐春夢。事同碧落之空。劇憐憔悴秋風。人比黃花之瘦。

石氏善果

石申。字仲生。灤州人。順治三年進士。歷官戶部左侍郎。贈尙書。祀鄉賢。有寶笈堂遺集。其女。清世祖恪妃也。漁洋山人池北偶談記其事。錄之如左。世祖皇帝恪妃石氏。灤州人。戶部侍郎申之女也。申父維嶽。明萬歷庚戌進士。官某省副使。會王府中官某。鳩其王。反誣其妃某弑逆。撫按以下。皆納其賄。將具獄矣。維嶽不可。力雪妃冤。至是申生恪妃。竟入宮掖。人以爲救妃之報云。

橋梓丹青

霸州韓古峯。姻丈。性嗜酒。工繪事。喜作寫意花卉。醉後落筆。生氣滿紙。酷似老蓮。子比賢。茂才。亦善畫。筆意蕭散。有乃父風。

一吾治水

陳子翹先生儀文安人一吾其別號也。性慧而奇。總角時輒失於父母。昆弟事皆身任之。每曰不弟卽不孝。識者重之。讀書超悟。不撫皮膚。或規以偕俗。弗從也。時家業中落。紀子湘太守。負人倫鑒。寄之。每宴會必招先生。先生敝衣冠。觴詠其次。一座皆傾。臧獲竊迂笑之。太守噓之曰。非常人也。康熙庚午科試。學使者賞其文。推爲八府諸生第一。是年秋闈。登賢書。九躡南宮。乙未會試。考官潘穎以元薦。王文恭公瑱麟曰。此才太奇。第二人允矣。潘曰。元以庸才也。王恙。舉筆授潘曰。君自爲之。潘援筆立點。定訖。王怒。潘亦怒。遂止。及書榜至十八名。王止而顧潘曰。君所奇者魁也。王意解。遂錄名入詞林。蔡宗伯昇元館課。必以第一名處之。方公靈皋得文稿。閱一藝曰。北方名士耳。再閱則曰。名下固無虛士。三閱起之。嘆爲天凡不可及。命駕排闥呼見曰。今再見先兄百川高境矣。遂訂交。張文和公廷玉讀其文曰。奇才也。然我則不敢用此人。其爲時所重如此。先生暮年。以文詞無實用。講求天下阨塞。民生利害。皆洞悉之。一日有飛騎傳宣曰。王召。授騎去。則怡藩也。是時畿輔大水。上命王開水利府。朱

文端公軾副之。規地營田。以備旱潦。議者以爲不便。王亦慮不能終其事。欲得穩形勢。通治法者咨焉。而朱公薦之也。先生啓曰。興水利者。去水害也。水聚則害。分則利。壅則害。行則利。去害之法。於隘者擴之。容義者分之。減塞者疏之。通漫者攝之。注害去。田乃可營。而營田以分水。亦正以除害。蓋溝渠洫澮。濬之距川。皆以行水。卽皆以分水。一川之水。散爲百溝。一溝之水。散諸千畝。將恐不足。詎患有餘。南人爭水如金。北人畏水如讐。用不用之異也。今用水爲田。卽用田分水。成田而水散。則利興而害息矣。王曰善。然議者謂人力不能反川原之性。然與對曰。營田於川。非於原也。北地高亢。合天下較之耳。專論此地。則高者十六。下者十四。淫潦汨之。半歸淪胥。規此營田。乃變汙萊爲秔稻也。王曰善。然旱則奈何。對曰。北地冬春多旱。甘露嘗於五六月。然過多。恒爲高田之害。初夏養穠。可借潤於河及泉。迨插秧時。正雨之時。水田可無憂旱。高田既苦雨。多宜洩於水田。亦可無憂潦。此營田之便也。王曰然。其爲地幾何。對曰。民間故種稻者。無假官營。則營民之不能營者耳。如後湖湖也。疏泉可田。太激澁也。開河可田。天津寶坻陸區也。引潮可田。任縣寧晉水鄉也。園泊可田。其他地勢。

可例推也。水高於地。溝而分之。水與地平。壅而激之。水卑於地。車而升之。行埕以防淫潦。閘洞以備蓄洩。經始既定。隨時修補。期以十年。抗稻與黍稷並茂矣。王顧朱公曰。讀書人不當如是耶。奏以先生行期。年水患平。不愆於所指陳之畧。至雍正五年。分四局。以先生領天津。因清班薄俸。欲請爲天津太守。復念清班不合外遷。欲請以編修帶管天津同知。上徑以侍講管同知。如開府儀。尋歷侍讀庶子。晉侍讀學士。而理局事如故。皆異數也。在津數年。百餘里水鄉皆大有秋。八年。設營田觀察使。命以侍讀學士兼僉都御史。領京東觀察使。京東貢山帶泉。營田尤便。開渠築圍。成良田數十萬畝。歲比大稔。先生請羅充天庾。以免穀賤傷農之弊。十一年。北京大水。漂沒田廬萬計。先生草疏以聞。或疑非使者事。先生曰。詩不云乎。跼蹐征夫。每懷靡及。不以一事自限也。敢坐視乎。得賑濟全活三十四萬口有奇。然議者遂以爲營田使不便。裁之。先生治水多靈異。至今猶嘖嘖稱之。著有蘭雪齋文集。學庸口義。鄉黨私記。毛詩臆評。離騷廣前定錄。天游錄。直隸河道事宜。治水末議。金剛經臆說。楞嚴經臆說。南華經解等書行世。

捐金贖師罪

交河蘇語年先生鶴成。幼穎悟。年十五。通春秋三禮。雍正乙卯舉人。乾隆丁巳成進士。有至性。母病風。不能言。先生扶持抑搔。悉中親意。父北流公。卒於官。先生匍匐奔喪。間關萬里。出沒風濤間。數瀕於危。卒得扶柩歸葬。人謂先生誠孝。有以感之也。繼遭太孺人憂。絕意仕進。居恒遇人厚。持己恬淡。高密軍公雨莊。鄉試薦卷房師。緣事成臺。先生爲捐金納贖得歸。時人咸仰其高誼焉。

井書御扇

井柏亭先生玉樹。文安人。天資清秀。工書畫。雕刻圖章。並臻佳妙。乾隆四十七年。游京師。以書法奇絕。得蒙召見。命書御扇。錄劉夢得陋室銘。上深嘉賞。賜以教職。不就。退居林下。書畫之名益重。踵門求者日衆。先生未嘗輕許之也。性鯁直。寡交游。重然諾。酷嗜杯中物。不與俗人爲伍。所以書畫。概不多見。得其片紙。珍如拱璧云。

全家殉難

王獻我先生策。文安孝子原五世孫也。孝子生子六人。至曾孫應霖。明萬歷庚辰進

士應期。萬歷己丑進士。先生爲應霖公仲子。折節讀書。沈酣經史。萬歷庚子舉人。官山西太谷知縣。有惠政。遭時多故。罷歸。崇禎戊寅。清師至。人皆棄城逃。親舊招之去。先生毅然曰。草莽市井皆臣也。況曾受一官。身爲民倡。逃以苟免。何面目見先人於地下。家人謹奉令。咸惴惴無敢他竄。已而城陷。先生朝服坐庭中。兵入。抗節不屈。遂及於難。子三人。次子先殤。長子層城。三子添丁。俱夫婦同死。孫及孫女十餘人。侍妾數人。僕婢十餘人。皆一時殞命。嗚呼。公爲孝子後。此一死也。所謂求忠臣於孝子之門者。不其然乎。兵旣退。子婦郭氏。自母家歸。無以爲殮。撤廳材作棺。三十餘具。次第收而瘞之。葬於祖塋。一時皆悲其殉難之慘。郭氏任邱縣光祿卿郭公女。先生次男婦也。時方寡居。光祿知公志。先期潛迎女以歸。故得獨生。以盡婦道。矢柏舟終其身。

一門風雅

文安紀孟起先生愈。康熙六年進士。天資朗豁。博學工詩。夙具偉畧。己酉土寇擄城。倡先守禦。邑賴以安。隨大將軍撫剿江西逆賊。恢復撫州。勸止殺戮。或遺以所俘婦女。貯之別室。訪其夫還之。歷官工科掌印給事中。祀鄉賢。著有式綸堂詩稿。仲弟吳。

字仲養。廩生。康熙己未。大城劉端敏公榷。薦舉博學鴻詞。著有脩庵詩稿。季弟元。字子湘。順治十二年進士。歷官漢陽。鞏昌等府知府。著有猷游詩稿。子遴宜。字毅亭。康熙甲戌進士。歷官吏科掌印給事中。著有龍城詩集。姪瀛宜。字廷亮。康熙四十四年舉人。官景州學正。著有五芝樓集。適宜。字偲亭。康熙五十三年舉人。官山東泰安州知州。有儉重堂集。遂宜。字緘三。康熙五十三年舉人。有詩名。官浙江仁和县知縣。達宜。字可亭。雍正元年進士。歷官刑部員外郎。有蘭蕕集。適宜。字碩亭。雍正二年舉人。有返吳吟。孫咸。字中涵。雍正元年舉人。官安徽旌德知縣。亦能詩。晉。字企瞻。乾隆三年舉人。官甘泉縣知縣。著有寶樹軒詩集。恒。字任甫。諸生。有藤花書屋詩草。復。字夢餘。乾隆九年舉人。有寶樹新屋詩草。姪孫宣猷。字次辰。號容庵。乾隆己未進士。官河間府教授。亦能詩。曾孫淑曾。字衣孟。號秋槎。乾隆十八年舉人。歷官湖南鹽法長寶道。著有漢皋集。曾孫婦劉氏。名錫友。著有松鶴軒詩集。一門風雅。四世詩人。洵爲菴林盛事。文安人語云。紀詩井字陳文章。萬里尋親孝子王。何文邑名人之多也。

父女善畫

崔青蚓先生子忠。高士也。明末補順天府學生。負才名。尤善畫。董尙書其昌異之。謂非近代所有也。益自重。凡以金帛請者。概不應。有友人官吏部。屬選人以千金爲壽。先生投之地曰。乃以選人金汙我耶。史忠正公家居。過其舍。見先生方絕食。乃留所騎馬。徒步歸。先生售馬。得十數金。呼其友與痛飲曰。此酒自史道鄰來。非盜泉也。一日金盡。絕食如故。好讀書。通大戴禮。發爲詩古文。奧博奇崛。超異時流。闖賊陷京師。先生出奔。鬱鬱不自得。會人有觸其意者。走入土室。匿不出。遂餓而死。先生二女。皆善畫。

芥子銅政

定興王芥子先生太岳。乾隆七年進士。官雲南布政使。先生弱冠入詞林。海內交推其文學。而先生獨志於經世之務。所至必爬梳剔決。據今攷古。咨民疾苦而討論之。在平慶及西安。皆有惠政。尤留心於水利。著涇渠志三卷。及在雲南。憫銅政之弊。於是旁搜博訊。指利害所由來。以求補救之術。大畧謂舊時滇銅。聽人取攜。自康熙四十四年。始請官爲經理。歲有常課。至雍正初。始開鼓鑄運京局。以疏銷積銅。茲銅路

已深。近山林木已盡。夫工炭價。皆數倍於前。而又益以課長之措克。地保之科派。官役之往來供役。廠民受價六兩四錢之外。尙須貼費一兩八九錢而後足。採辦之難。此其一也。滇銅自乾隆四五年以來。歲產六七百萬觔。乾隆三十八年三十九年。以一千二百數十萬告。此滇銅極盛之時。至今日而京師之運額。既不可缺。而江南江西以外。尙有浙閩黔粵秦楚諸路開鑄。求之益衆。責之益急。雲南之銅。何時足乎。採辦之難。此其二也。礦民皆無業之人。領本到手。往往私費。亦有開闢無成。虛費工本。懸項累累。名曰廠欠。自頃定議。每歲終。責取無欠結狀。然工本不足。廠民不能徒手枵腹而致採。則爲之量借油米鑪炭。以資工作。而其欠借不歸之油米鑪炭。亦不下巨萬之值。大廠之通累。積重莫蘇。採辦之難。此其三也。小廠收買。渙散莫紀。合計數十小廠之銅。比二三大廠。不能半。則大廠安得不困。採辦之難。此其四也。若夫轉運之難。牛可載八十觔。馬力倍之。一千餘萬之銅。非十萬匹頭不辦。今司運之官。既皆增價僱募。然不免以人易畜。里民每贏數日之糧。以應一日之役。喜事之吏。驅率老幼。橫施鞭打。瘁民生而虧政體。非小故也。嘗竊求前人之論議。其有已效於昔。而可

試行於今者。曰多籌息錢。以益銅價也。通計有無。以限買銅也。稍寬考成。以舒廠困也。實給工本。以廣開採也。預借僱值。以集牛馬也。銅政之要。必寬給價。給價足而後廠衆集。廠衆集而後開採廣。開採廣則銅多。銅多則用裕。有銅本斯有銅息。有鑄錢斯有鑄息。以廠民之銅鑄錢。即以鑄錢之息與廠費。不他籌。澤不泛及。而此數十廠百千萬衆。皆有以蘇困窮而謀飽暖。積其歡呼翔踴之氣。銅卽不增。亦斷無減。雲南山高脈厚。到處出產礦砂。但能經理得宜。非惟裨益銅務。而數千萬謀食窮民。亦得資以生活。由此觀之。小廠非無利也。誠使加以人力。穿峽成堂。則初闢之礦。入不必深。而工不必費。又地僻人少。林木蔚萃。炭亦易得。較大廠攻採之費。有事半而功倍者。誠於廠之近邑。招徠土著之民。聯以什伍之籍。又擇其愿樸持重者爲之長。於是假之以底本。益之以油米薪炭。則渙散之衆。皆有所繫屬。然後示以約束。董以課程。作其方振之氣。厚其已集之力。使皆穿石破峽。以求進山之礦。雖有不成者寡矣。銅運之在瀘境者。後先踵接。依次抵瀘。而瀘州旋收旅兌。略不停息。則終無儲備之日。惟寬以半歲之期會。然後瀘州有三四百萬之儲。儲之既多。則兌者方去。而運者卽

來。是常有餘貯也。如是而凡運官之至者。皆可以時兌發。次第啓行。在瀘既無坐守之勞。在途亦有催督之令。運何爲而遲哉。疏上。不果行。其後銅政日益困敝。始取其說。稍稍用之。然亦不能盡也。是以滇之官吏。至今莫不習其書云。先生有功銅政甚偉。滇人思之。先是昆明縣五華書院中。祀鄂文端公爾泰。楊文定公名時。尹文端公繼善。陳文恭公宏謀。李恭毅公湖。明將軍瑞。爲六賢祠。至是以先生附祀。更名七賢。

閻公對聯

通州閻忠烈公應元。江陰典史。已遷英德主簿。道阻未赴。寓居江陰。清兵至。環攻兩月餘。城不破。有僧云。江陰乃芙蓉城。攻帝則花自落矣。乃專攻花家壩。城遂破。相傳臨難自題一聯云。七十日帶髮效忠。表太祖十六朝人物。三千人同心赴義。存大明一百里江山。後建祠卽用此聯。

朱太守

朱英。原名灤。號宣初。朱文正公珪之姪孫也。官知府。解音律。嗜吟詠。工繪事。花卉果品。活色生香。兼畫人物。雅近新羅。

林佳蔭

康熙甲戌。特旨禮部取霸州廩生林佳蔭。充內官學漢文教習。諭廷臣曰。是朕教養林師之孫。其家甚貧也。時上御極。已三十餘年。佳蔭方爲諸生。林師何人。而聖祖憐憫乃爾。錄此以諗熟於國故者。此事實獻徵存錄海島錄紀之均未詳其出處

朱公博學

外伯祖朱綱齋先生雲錦。永清名孝廉。幼聰慧。日誦數千言。稍長。博通經史。弱冠舉於鄉。有經世之志。屢躋禮闈。遂沈酣於詩古文辭。霸州吳霽峯中丞。重其人。聘司翰札。所有奏章。均出先生一人之手。晚年官南和縣教諭。著有皖省志略。豫省識小錄。勸織俚言。蕉雨軒集。未梓。光緒庚子。遭兵燹。良可惜也。葉衣珊明經。言先生有壽乃祖。佩蘭孝廉序一篇。誠吉光片羽也。亟錄於此。

葉佩蘭孝廉六十壽序

今之縣。古之國。今之令。古之侯也。厥秩七品。厥祿千金。奔走而聽令者。常從吏胥。下逮鄉保。不下數百人。邑數百戶。皆神明仰之。而父母奉之。亦大丈夫得志於時者之

所爲也。榮已哉。膺斯任者。甲科尙已。次則登乙科者。自銓部以次進用。聖天子加意人才。憫其取之於少壯之日。用之於遲暮之時。則又設挑班。俾得隨時拔其尤者。需次省垣。及時補用。高才捷足者。圖進取。中人亦希以脂膏自潤。故士之名在賢書者。皆翹首而望。計日而期。而翼俸其一得。惟吾佩蘭姻兄。則獨異是。君少吾約十許歲。其少也。固見其負穎異之資。嶄然露頭角。稍長。應童子試。及爲諸生。應科歲試。輒冠其軍。甫逾弱冠。卽領戊午科鄉薦。戚鄰咸以遠大期之。乃屢躋禮闈。連不得志於有司。然遇恩挑之典。則不肯隨班登內閣之堂。及屆期。銓選部檄催。亦不肯治裝應考。功之格。游好咸異之。或爲勸駕。則笑而不應。余常流連其別墅。爲平原十日飲。酒酣耳熱之餘。常微叩之。君則曰。他人或不我知。公固箇中人。豈尙昧於此乎。夫國家之設令。將以興利除害也。吾曹生長斯邑。此間利之宜興者何事。弊之宜除者何事。茫如也。卽微知其端倪。若何興而若何除。豈有把握乎。又將以爲朝廷惠養斯民也。吾輩讀書學古。固志在循良。然一人處堂皇之上。其趨走而聽命者。皆思藉令以爲利。我欲達民隱。而彼則思掩令之耳目。我欲伸冤抑。而彼則慫令之心思。吾卽竭其智。

而力與之角。其不勝者。勢之常也。且吾又疏於才。駕駑駘之乘。負千鈞之重。而行羊腸之道。陟九折之坂。其不顛而躓者。幾何。吾憬然曰。君未歷其途。而洞其艱。炫榮祿於前。而裹足不進。明決若斯。於爲令也。奚有。顧退然若不勝。殆韓子所謂爲人也過少。自爲也過多者歟。然吾登其堂。則秩秩然。肅肅然。諸子皆量其才而受之事。蓋鄧元侯一門之內。七葉俱成歟。與宗族鄉黨處。則接之以撝謙。諭之以夷庚。且與父言慈。與子言孝。皆薰其德而善良。有爲不韙者。畏君之知。甚於鞭扑。則濟下之伏不關。太原之王彥方。合爲一人者也。且老而好學。如袁伯業。後進之秀。從之游者。口講指畫。殘膏賸馥。沾鈎無窮焉。晚又好方書。施良劑活人。范希文之不爲良相。卽爲良醫之胸襟。如出一轍焉。是君之不出而爲令。被其澤。濡其化者。殆過之。則又何嘗狹其兼善之量哉。今年己周甲矣。九月良辰。實其初度。家習泉叔。將攜菊醞壽之。且命雲爲侑觴之詞。駢四儷六。非余所能也。度亦非公所好。故述疇昔往復之言。藉以見君之淡於榮祿。而澤足被物者。有如斯。則身康強而子孫逢吉。必皆自愷悌慈祥之念。醞釀而成。以古證今。有如蓍蔡。何庸燕詞之頌禱爲耶。吾知君展而觀之。必有契於

中欣欣而壹。陶陶而醉曰。綱齋知我哉。綱齋知我哉。是爲序。

谷公良史

谷霖蒼先生應泰。豐潤人。順治四年進士。歷官浙江按察司僉事。著有明史紀事本末八十卷。其書仿袁樞通鑑紀事本末之例。纂次明代典章事蹟。凡八十卷。每卷爲一日。先生成此書時。明史尙未刊定。無所折衷。故紀靖難時事。深信從亡。致身諸錄。以惠帝遜國爲實。於滇黔游蹟。載之極詳。又不知懿安皇后死節。而稱其青衣蒙頭。步入成國公第。俱不免沿野史傳聞之誤。然其排比纂次。詳略得中。首尾秩然。於一代事實。極爲淹貫。每篇後各附論斷。皆仿晉書之體。以駢偶行文。而遺詞抑揚。隸事親切。尤爲曲折詳盡。考邵廷采思復堂集。明遺民傳。稱山陰張岱。嘗輯明一代遺事。爲石匱藏書。先生作紀事本末。以五百金購請。岱慨然與之。又稱明季稗史雖多。體裁未備。罕見全書。惟談遷編年。張岱列傳兩家。具有本末。先生並採之以成紀事。據此則先生是編。取材頗備。集衆長。以成完本。其用力亦可謂勤矣。

王宜人墓志銘

天津嚴範孫先生清遺老也。少有才名。力求實學。通籍後。有經世之志。游歷外洋。歸以提倡新學爲己任。民國以來。無心問世。隱居沽上。以詩酒自娛。而先生古文。殊不多見。去歲見文安薛母王宜人墓志一篇。錄此以示一嚮之賞。其辭曰。

民國十一年夏四月。奉直相攻。勝芳鎮薛君寶田之妻王宜人。以衛姑死於兵。聞者莫不哀之。始光宣間。寶田紹父志。游宦陝西。宜人實從。室無婢侍。躬治饗飧。以佐朝夕。或勸其少逸。宜人慨然曰。自古潔志好修之士。漬於墨而潰其防。或多自於閭內。吾詎可不黽勉。旣厥事。而以是累吾夫哉。因約其衣服飲食。壹如里居時。寶田授同州府經歷。迭權大荔韓城白水諸縣事。以廉公著秦中。宜人之助爲多。逮清末。寶田棄官歸。太宜人春秋已高。嬰疾沈痼。動息不自由。惟宜人能承適其意。戰初作。火器殷熾。屋瓦皆震。太宜人故重聽。宜人戒家人勿聲。由是內外帖帖。方是時。宇內囂然。疆域分裂。國人激攘無虛日。勝芳鎮隸直隸文安故邑。大聚魚鹽米穀。爲重商大賈所湊。又饒蒲蛤利。顧三面阻水。春夏暵旱。猶沮洳艱涉。時兩軍宜營平原廣野間。直軍主者。謂地當燕魏衝。輒壁鎮北。旣交綏。值直軍偶失利。輜重自下隰馳高原。猝凝

滯不得上。盡見鹵獲。主者則騰誣造謗。詭謂鎮人皆衣長衣。伏短槍於暗陬。伺隙助敵。亟陳其狀上。援軍司令楊公。以爲事固彰灼。無所復疑。且驟擁軍返。比至鎮。乃大掠寶田方詣里人。條具供億。家老僕應門。羣卒闐然入。僕驚逸。宜人聞變遽出。則欸欸然爲好語解之曰。即有所需。室所陳。壹任爾乎取之。慎勿驚老母。語關涉未既。一卒突持槍相嚮。機驟啓。傷宜人首。寶田聞耗。馳歸營救。已弗及。一鎮咸驚。有堅鑢其戶者。羣卒環門而轟。將火之。援軍司令楊公。初得所白事。深揆其不然。旋亦踵至。主者特盛警衛。杜訴者。寶田卒冒禁具述。楊則大慚。亟移軍去。而鎮人禍立解。宜人太學生啓承之次女。陝西○○○○之冢婦。年十九而歸寶田。生於同治二年九月十六日。卒於民國十一年夏。歷四月十一日。春秋六十。子二。長福源。出嗣小宗。次祿源。肄業中學校。女一。適同邑程○○。其明年夏四月。宜人夫弟寶書持狀來請銘。修嘗讀秋杜之詩。其三章曰。王事靡盬。憂我父母。男女睽隔。不自言其傷。而獨以憂其舅姑爲大感。詩人豈故迂其義哉。蓋不如此。不足以盡夫婦之禮。而爲人倫之極也。今宜人履險歷變。猶將護慈親。無失常度。俾不罹於震愆。則其平昔懇懇篤於人紀者。

可知也。雖詩所稱。何以過。嗚呼。是誠可則也已。而崎嶇暴人之間。竟猝與禍會。不獲共寶田從容偕老林泉。世之人固有愀然深悲其不幸者。修觀自古亂亡之際。其造孽者或僅數人。然每每竟保首領以歿。而任天下孝子悌弟貞婦烈女。無罪而併命。兵革盜賊之中。造物者當亦不能無憾。然人莫不有死。其能順性命之理。是得全其所受於天也。如宜人者。則雖謂之考終可也。矧以宜人故。濟艱銷萌。一鎮賴以復安。其有功於鄉里者甚大。則宜人其可無恨。謹按銘者誄之遺。非於德於功於言有立。或無以舉其詞。婦人處順境。雖有婦行。尤莫能過禮之中制。今宜人純德異烈。孝異之聲。流播海內。是於法宜銘。銘曰。

海有時而駢闐。陸有時而淪漣。惟宜人之故里。固避世之所樂稱焉。胡丁古今非常艱阨之會。鵷鸞竟與螻蟻而同捐。嗟夫天道之無知也久矣。蓋不自宜人而始然。我銘以昭之。惟以著其仁賢。

華公醉書

天津華弼臣先生。家師虞孝廉癸巳同年友也。本津郡世家。性和而嚴。尚風節。博學

工書。深得魯公神髓。民國成立。傷心時事。恒在醉鄉。有時乘醉揮毫。力透紙背。堪與何道州相伯仲。嘗書南皮張氏二烈女碑。人爭拓之。一時洛陽紙貴。甥寧河王酌丞大令。因索書贈以一律。詩云。

獨愧離羣久索居。文人結習未應除。回思紫陌趨朝日。正是黃庭落紙初。禿筆已成蘇武節。端人猶見魯公書。劃如太華巍峩至。寶氣英光滿敝廬。

母女唱和

孫夢仙女士雲。天津人。伯蘭先生之女弟也。性慧多才。工繪事。少就外傳。學於海陽蔣香農先生。博通經史。習禮明詩。著有夢仙詩稿。長適同邑羅君雲章。有賢聲。事姑至孝。撫猶子以慈。經營內政。井井有條。暇日猶不廢吟詠。女公子真如沛如。林琴南孝廉女弟子也。詩筆宛肖其母。一時傳爲佳話云。

李少尹

宛平李照。字小竹。本姓余。竹西先生之子。官常山少尹。善畫花卉翎毛。罷官後。流寓梁溪。與秦誼亭交善。亦工山水人物。

王烈婦

烈婦董氏。文安人。家赤貧。鬻身養母。大城主幼庵增翻。納爲遣室。王選康平縣學博。未赴。乙卯八月。病卒於家。董絕粒以殉。年十九歲。劉子山師。爲賦孝烈婦董氏行。詩曰。

曾聞樂府董嬌嬌。花妬顏容柳妬腰。更有裙釵生北地。絕勝金粉滿南朝。南朝豔曲歌桃葉。王家大令來迎接。子敬人琴一旦亡。未聞死有相從妾。董家孝女出文安。白屋風涼續袂單。養母苦求供菽水。鬻身何惜種燕蘭。此時月老牽紅線。烏衣門巷人。人羨。忍別高堂白髮親。啼痕界破新妝面。天壤王郎字幼庵。康平學博慶彈冠。方欣紅袖圍銀燭。不料青霄下玉棺。王郎永訣中秋節。少婦肝腸皆斷絕。拚教絕粒殉夫君。相見黃泉心似鐵。貧家曾未讀詩書。大義偏能光日月。同里衣冠爲請旌。平舒一邑有光榮。海棠斷送三更雨。湘材同留萬世名。天扼佳人何太苦。香炷斷頭釵折股。小星甘逐少微沈。月宮罷奏霓裳舞。古來董宛董申林。豔福何人堪比數。綠珠慘墜鳳凰樓。小青遭妬靡脂虎。嗚呼孝烈芳魂二九春。自由薄俗可還淳。便當銘勒駕鸞

塚壓倒隋家董美人。

文安女

文安紀秋水先生途。早負文譽。尤工於詩。嘉慶三年舉人。官萊蕪知縣。有惠政。萊民德之。嘗賦文安女一篇。錄之如下。

文安女并序

葛怡堂言。邑辛酉災後。鄉民多賣兒求活。奴價升米。僅數日食。山東巨猾。挾重賞來購。農民某氏女。及笄。有姿色。家數口垂斃。女請行。談笑別父母。及去。至中流。望鄉遙拜。拜已。遂赴水死。怡堂約作詩紀之。不果。棣州無事作此。怡堂述時。忘其姓氏。故以文安女名篇。詩曰。

濁濁溝中泥。皎皎機上苧。三五顏如花。文安小家女。太歲在辛酉。魚鼈逐人食。河北爲比鄰。飢骸滿澤國。無地掘草根。少錢買魚鮑。三日斷炊煙。阿爺倚門坐。出門水茫茫。入門天蒼蒼。弟妹索餅啼。阿孃傷中腸。阿爺視女吁。阿孃視女悲。生女不如男。負米他鄉陞。錢錢大船來。言是山東豪。左顧擁錦紈。右手持錢刀。里黨妖冶兒。牽臂出

茅屋。朝沐登客舟。暮釜煮牛肉。敢惜女兒身。不救爺孃死。面脂掃雙蛾。願作臨淄伎。媒灼四五輩。奔走顏色歡。翦布爲女衣。買珠爲女冠。不愛明月珠。不樂繡羅衣。但求數石粟。堂上無苦飢。秋風聲蕭蕭。揚帆達故土。揮手慰爺孃。斂衽辭娣姒。篋有刺殘繡。妹長爲花綯。橐有未裝縣。弟寒爲短襦。女身浪中萍。女意水中石。一笑赴清流。紅顏殉深澤。里老聞風驚。家人招魂哭。至今廣陵城。過者悲魚腹。我欲竟此曲。此曲促且哀。年年女貞木。花落孟家臺。孟母臺在文安城東

良朋高誼

天津梅樹君廣文。學問淹雅。喜爲歌詩。以名孝廉。居冷官。公署蕭閒。吟詠無虛日。罷官後。結梅花詩社於沽上。一時風雅之士。多與唱酬。性寬仁。篤於友誼。與文安紀秋水大令。爲文字交。紀故廉吏。歿後。家業中落。妻子飄流。先生時加周恤。並爲收其遺稿。即今所傳豆花齋詩草是也。

石耕善琴

韓經正先生畱。一字石耕。順天人。明逸民也。負性孤僻。率行己意。甲申亂後。與兄田。

俱無家室。多客於人。凡所主家。皆事之惟謹。欲饋之衣。置其臥所。先生間取衣之。不問所從來。若使之知。即不受。嘗飲酒家。酣飽而去。庸保追取酒直。酒家止之。他日得白金數兩。盡付酒家償直。夙善琴。得意時彈之。有請之彈者。終不爲彈。彈時有稱善者。即止。以此多困。著有天樵子集。

李公盛德

長垣李章六先生振世。初選河南獲嘉令。邑當衝要。差繁地瘠。先生一意拊循。貧民無食者。給糧米牛具。任其開墾。闢荒地三百餘頃。時征吳逆。官兵過境。供億無缺。民不知擾。令江西永豐。署中舊有妖祠。蟒蛇爲祟。驅而斬之。蟒長二丈餘。郡守驚其膽。後官湖廣按察司僉事。時有裁兵之變。單騎入賊壘。諭以大義。衆感服歸順。全楚悉平。署臬篆。多所平反。遷陝西莊涼道。布政司參政。以病乞歸。著有退食稿。

提因讓產

劉提因先生果實。滄州世家子。性聰慧。讀書一過成誦。年十三。補諸生。十七舉於鄉。二十一成進士。授編修。天性孝友。父歿。遺產盡讓於兄。妻亡。不再娶。每日夫死改適。

爲喪節。妻亡再娶。獨非失義耶。

華省仙郎

寶坻王子千先生。煥。性情高逸。博覽羣書。以明經授光祿丞。進刑部郎。每退食。輿朱竹垞。姜西溟。趙秋谷。諸公。樽酒流連。揚乾風雅。一時有華省仙郎之目。及出守惠州。政簡刑清。觀風問俗。又得其鄉名宿梁藥亭。陳元孝。游詩境益進。觀察永寧。以憂歸。久之。再補溫處副使。潔清自矢。一如守惠時。顧性耽吟癖。曰。吾將恣遠遊以自快。禹穴蘇臺。淮陰陽羨。履齒無弗歷焉。所至輒交其地之賢豪。花晨月夕。載酒揚帆。時令雙鬢按拍。唱所製新樂府。望者疑爲神仙中人也。

竹坡工書

磁州董竹坡先生。昌齡。名諸生也。肆力於學。所作古文。不同凡響。楷法直逼鍾王。求書者無虛日。不求仕進。自適於山水間。日與王西園。劉他山。彈琴賦詩。又皆以行業自勵。非徒作穢阮清談也。

若水善畫

王若水先生澆。亦磁州諸生。頗形偉貌。性高尚。不樂仕進。能詩善畫。鄉里奉爲祭酒。與董竹坡。劉他山。詩酒言歡。時稱三老。

一門孝行

張上若先生潛。磁州人。明大司馬鏡心子。器質端偉。十二歲。補博士弟子員。順治九年。成進士。選庶常。以母病乞歸。日夜侍湯藥。偕妻劉弟衍。爭割股以進。母小愈。旣而連丁內外艱。服闋入都。會世祖命入覲。監司條奏地方利病。大梁道沈荃。詢於先生。先生言。鄴下朝歌。地當孔道。歲苦供億不支。請以後凡大兵駐二郡。旁邑協濟。民力可甦。沈然之。章上得旨。著爲例。歸日。手六經。史漢。及韓柳陶杜集。校讐評點。常受經於無錫堵孝廉濂生。生時周問不絕。歿卹其孤。

先麓著書

肅寧苗先麓先生夔。宿儒也。幼嗜六書形聲之學。讀許氏說文。若有夙悟。又得顧處士炎武音韻五書。慕之彌篤。年二十餘。即纂毛詩韻訂。又纂廣輿一編。嘗於河間城外。得漢時君子館甄。又得開元瓦於獻王墓旁。私獨欣喜。道光十一年。舉優貢生。高

郵大儒王氏念孫父子。聞先生之說。禮先於先生。遂與暢論音學源流。由是譽望日隆。初隨編修汪君振基。衡文山西。繼隨祁文端公。衡文江蘇。所至甄拔名流。周覽山水。祁公還京師。乃釀金刻先生說文聲訂若干卷。說文聲讀表七卷。毛詩韻訂十卷。建首字讀一卷。以爲許叔重遺書。多有爲後人妄刪。或附益者。乃訂正說文聲類八百餘事。顧氏音學。所立古音表十部。宏綱已具。然猶病其太密。而戈麻既雜西音。不應別立一部。於是併耕清及蒸登於東冬部。併歌戈於支脂部。定以七部。隱括羣經之韻。書出。識者歎其精審焉。咸豐七年五月初七日卒。春秋七十有五。子玉璞。擇先生尤嗜之書。納諸棺中以殉。曾文正公銘其墓。

于公讓財

宛平于司直先生奕正。明末諸生也。性孝友。父歿。讓財於兄弟。自居荒園。每於霜清木老時。策蹇入名山。攀枯藤。坐危石。慨然賦詩。有超世之概。其亦加人一等矣。

中華民國十六年一月初版



定價大洋貳角對折

編輯者 安次馬鴻翱

校閱者 天津戴韞璋

刷印者 天津天成印字館

發行者 安次得勝口鎮三餘堂

代售處 北京天津各大書坊

鳴謝

本書出版蒙族叔

香蕊先生捐助印刷費洋貳拾圓又蒙天津 戴甥

育三捐助印刷費洋拾圓特此鳴謝

713